

Inatsisartut suleriaasianni § 32 naapertorlugu aalajangiiffigisassatut siunnersuut manna Naalakkersuisut matumuuna saqqummiuppaat:

Aningaasanoorutit ilaat pillugit Kalaallit Nunaannut inatsimmut tunngatillugu Namminersorlutik Oqartussat oqaaseqaatissaat pillugu Inatsisartut aalajangiiffigisassaattut siunnersuut.
(Aningaasaqarnermut naalakkersuisoq)

Siullermeerneqarnera

Pissutaasoq

Aningaasanoorutit ilaat pillugit Kalaallit Nunaannut inatsisissatut siunnersuut Naalagaaffiup Kalaallit Nunaanni Sinniisuata Kalaallit Nunaanni Namminersorlutik Oqartussanut oqaaseqarfigisassanngorlugu saqqummiuppaat.

Danmarkimi aningaasanoorutininik ingerlataqarnerup ilaata namminersortunngorsaavigineqalersinnissaa pillugu danskit naalakkersuisuisa aalajangiinerat Naalagaaffiup Kalaallit Nunaanni Sinniisuata 2010-mi februarimi Kalaallit Nunaanni Namminersorlutik Oqartussanut saaffiginnissutigaa.

Inatsisissatut siunnersuutit danskit naalakkersuisuinit saqqummiunneqartut ulloq 1. januar 2011-mi atuutilersussatut Folketingimit akuersissutigineqarput. Tassunga ilutigitillugu inatsisit, ilaatigut Kalaallit Nunaanni aningaasanoorutininik ingerlataqarnermik maleruagassiisut ilaasa arlallit atorunnaarsinneqarnissaat Folketingip aalajangiuppaat. Pineqartut tassaapput eqquniaasitsinerit, eqqoriaasitsinerit internetsikkullu aningaasanoorfiit, sumiiffinni ataatsimoorluni eqqoriaasitsisarkerit aamma eqquniaasitsinerit tamanut iluaqutissiisut neqeroorutaaneri pillugit maleruagassat.

Aningaasanoorutit allat, matumani ilanngullugit aningaasanoorutininik ingerlatsivinni neriniartarfinnilu aningaasanik ikisilluni pinnguaatit eqqugassaqartitsisut Namminersorlutik Oqartussanit inatsisitigut maleruagassiuunneqartuupput.

Aningaasanoorutininik ingerlatsinerup ilarujussuata inatsisitigut maleruagassiuunneqarunnaarnissaa pinngitsoorniarlugu Naalagaaffimmi oqartussaasut aningaasanoorutit ilaat pillugit Kalaallit Nunaannut inatsisissatut siunnersuummik suliaqarput. Siunnersuummi maleruagassiuunneqarput aningaasanoorutit naalagaaffiup inatsisaasigut maleruagassiuunneqartut, siunissamilu Kalaallit Nunaanni neqeroorutaasussat.

Aningaasanoorutit ilaat pillugit Kalaallit Nunaannut inatsisissatut siunnersuummi aalajangersarneqarpoq danskit naalagaaffiata aningaasat, Kalaallit Nunaata Danske Spil A/S-ip 2010-mi sinneqartoortuata ilaannit pissai atuisunut akigititamut naleqqersuummik aaqqillugit Kalaallit Nunaanni Namminersorlutik Oqartussanut ukiumoortumik nuuttassagai. Tassuunakkut qulakkeerneqassaaq aningaasat Kalaallit Nunaata Danske Spil A/S-imit maanna pisartagareriigaasa, aammalu Tipsernermit lottornermillu iluanaarutinit agguassisarneq pillugu Inatsisartut inatsisaanni maleruagassat naapertorlugit agguanneqartartut ikilisinneqannginnissaat. Tassunga atatillugu imaappoq aningaasanoorutit ilaat pillugit Kalaallit Nunaannut inatsisip qulakkiissagaa Kalaallit Nunaata aningaasat tungaasigut allannguuteqanngitsumik inissisimanissaa.

Tunngavik

Siunnersuutip siunertaraa Kalaallit Nunaanni aningaasanoorutininik ingerlatsinerup inatsisitigut maleruagassiuunnissaa, tassungalu atatillugu aningaasanoorutit Kalaallit Nunaanni

neqeroorutigineqartut inatsisitigut aaqiiiviginissaat, taamaaliornikkut Danmarkimi inatsisinut attuumassuteqarneq maannakkut atuuttoq allannguuteqaqqunagu, aamma aningaasanoorutininik ingerlatsinerup ilaata namminersortunngorsaaviginerata kingorna.

Eqquniaasitsinerit kiisalu hestininik qimminillu sukkaniutsitsilluni eqqoriaasitsinerit, aningaasanoorutininik ingerlatsinerup ilaata Danmarkimi namminersortunngorsaavigineqarnerata kingorna Danske Spil-ip kisermaassilluni ingerlatsisinnaaneraniginnassapput.

Eqqoriaasitsinernilli allanik neqeroorutit internetsikkullu aningaasanoorfiit namminersortunngorsaavigineqassapput, taamaalillutillu Danske Spil-ip kisermaassilluni ingerlatsisinnaanerani pineqartunut ilaajunnaassallutik. Aningaasanoorutininik neqeroorutillit allat, matumani ilanngullugit nunat tamat akornanni aningaasanoorutininik neqeroorutillit taamaalillutik aningaasanoorutininik taakkuninnga neqerooruteqarsinnaanermut akuersissummik pisinnaalissapput.

Danskit maleruagassiaasa allanngortinneqartut aammattaaq assersuutigalugu kingunerissavaat Danmarkimi aningaasanoorutininik neqerooruteqartut tamarmik danskit selskabinut akileraartussaatsineranni pineqartunut ilaalernissaat.

Inatsisissatut siunnersuutikkut qulakkeerneqarpoq aningaasat Kalaallit Nunaanni agguanneqartartut amerlassusiisa maleruagassianut atuutereersunut sanilliullugit allannguuteqaqqinnissaat.

Inatsisissatut siunnersuutip imarisai

1. Aningaasanoorutit Danske Spil-imit neqeroorutigineqartut, matumani aamma eqquniaasitsinerit, eqqoriaasitsinerit internetsikkullu aningaasanoorfiit

Danske Spil-ip siunissami Kalaallit Nunaanni kisermaassilluni neqeroorutigisinnaasatuariilissavai eqquniaasitsinerit aamma hestininik qimminillu sukkaniutsitsilluni eqqoriaasitsinerit. Aningaasanoorutit sinneri Danske Spil-ip maanna kisermaassilluni ingerlatsisinnaanerani pineqartut siunissami aningaasanoorutininik neqerooruteqartunit allanit aamma neqeroorutigineqarsinnaalernissaat siunnersuutaavoq, aatsaalli danskit aningaasanoorutininut oqartussaasui tamatumunnga akuersissuteqarpata.

Inatsisissatut siunnersuutip kingunerissavaa aningaasanoorutininik Kalaallit Nunaanni neqerooruteqarsinnaanermut akuersissutip Danmarkimi pinnguaatinik ingerlatsisinnaanermut akuersissummik peqartunut tunniunneqarsinnaanera. Tassa imaappoq aningaasanoorutininik Kalaallit Nunaanni neqerooruteqarsinnaanermik akuersissut tunngaviatigut taamaallaat tunniunneqarsinnaassasoq Danmarkimi aningaasanoorutininik ingerlatsisinnaanermut akuersissummut atasumik, aammalu aningaasanoorutininut Kalaallit Nunaanniinnaq neqerooruteqarsinnaanermut akuersissuteqartoqarsinnaassanngitsoq. Taamaattorli siunniunneqarpoq neqerooruteqartut Kalaallit Nunaanni najugaqartut imaluunniit ingerlataqartut, eqqoriaasitsinernik internetsikkullu aningaasanoorfinnik neqerooruteqarnissamut akuersissutinik ukioq ataaseq atuuttussanik tunineqarsinnaanissaat, aatsaalli aningaasanoorutitigut isertitassat ukiumut 1.000.000 kr.-it inorpatigit.

Danmarkimi aningaasanoorutininik neqerooruteqarnissamut akuersissutinik peqartut pineqarnerattuut, aningaasanoorutininik neqerooruteqarsinnaanermut akuersissutinut atatillugu immikkut ittumik akiliisitsisoqartannginnissaa siunnersuutaavoq, tassami aningaasanoorutininut

Kalaallit Nunaanni neqeroorutigineqartunut atatillugu immikkut aningaasartuutissat annikitsuarsuunissaat eqqoriarneqarmat. Taamaattorli siunnersuutaavoq aningaasanoorutininik neqerooruteqartut, aningaasanoorutininik Kalaallit Nunaanni neqeroorutigineqartuninik ingerlatsinissamut akuersissummik immikkut ittumik ukiumi ataatsimi atuuttussamik tunineqartut 50.000 kr.-inik akiliisarnissaat, aningaasanoorutininut oqartussaasut qinnuteqaatip suliarineqarneranut, akuersissutip suliarineqarneranut aammalu akuersissummik peqartup nakkutigineqarneranut aningaasartuutaannut matusissutaasussanik.

Eqquiniaasitsinernut Danske Spil-ip kisermaassisinnaatitaalluni Kalaallit Nunaanni neqeroorutigisaanut tunngatillugu siunnersuutigineqarpoq eqqukkamut akileraarutip, eqqukkap aningaasartaasa 200 kr.-init sippuutaasut 15 pct.-iattut annertutigisup danskit naalagaaffiannut akilerneqartartup atuutiinnarnissaa.

Aningaasanoorutit namminersortunngorsaavigineqartut Kalaallit Nunaanni neqeroorutigineqartussat akileraarutaasa ilusilersugaanermikkut aningaasanoorutininut taamaattunut Danmarkimi neqeroorutigineqartunut atuuttuut assigissagaat siunnersuummi allassimavoq, tassa imaappoq eqqukkat akileraarutaannik akiliisoqassanani kisiannili aningaasanoortitsinermi isertitat tamarmiusut (Brutto spille indtægt) akileraarutaannik 20 pct.-iusumik akiliisoqassalluni. Aningaasanoortitsinermi isertitat tamarmiusut akileraarutaannik (BSI-afgift) akiliinissamik siunnersuummut tunngaviuvoq akileraarummik akiliinnginnissamik aalajangersagaq maannakkut atuuttoq aningaasanoorutininut kisermaassilluni ingerlatsiviusunut atuummat, akerlianilli aningaasanoorutit siunissami namminersortunngorsaavigineqarnermikkut unammillerfiulersussaallutik. Aammattaaq akileraarummik assigiissumik akiliisitsisarneq aningaasanoorutininik neqerooruteqartut aammalu oqartussaasut allaffissornerannik oqilisaassissaaq, aningaasanoorutit sumi neqeroorutigineqarnerat apeqqutaatinnagu, aammalu akileraarummik naatsorsuinermi akiliinermilu kukkusinnaanerugaluaq pinngitsoortinneqassalluni.

Aningaasanoorutininik Kalaallit Nunaanni neqerooruteqarsinnaanermut akuersissut siullertut ingerlatseqatigiiffinnut, amerlanertigut aningaasanoorutininik Danmarkimi neqerooruteqarsinnaanermut akuersissummik peqareersunut attuumassuteqartarmat, aappaattullu akileraarut danskit naalagaaffiannut akiligassaammat siunnersuutigineqarpoq nakkutilliinerup misissuisarnerullu danskit oqartussaasuinit (aningaasanoorutininut oqartussaasut aamma SKAT) ingerlanneqarnissaat, aammalu aningaasanoorutininik neqerooruteqartut aningaasanoorutininut neqeroorutigineqartunut tunngatillugu maleruagassat piunasaqaatillu, akuersissuteqartarnermi piunasarisanut, naatsorsuutininut, akileraarutissap nalunaarutigineqartarneranut akilerneqartarneranullu il.il. tunngasut, danskit aningaasanoorutininut inatsisaat malillugit maleruagassaasa assingi maleruassagaat.

Danskit oqartussaasuisa, nunat avannarliit suleqatigiinnissamik isumaqatigiissutaanni aalajangersakkat atuuttut naapertorlugit Kalaallit Nunaanni oqartussaasut nakkutilliinermi misissuinermilu ikiuuteqqullugit qinnuigisinnaavaat. Nunat avannarliit suleqatigiinnissamik isumaqatigiissutaat atuutsissallugu naammanngitsoq paasinarsissappat akileraarnermut ministerip, nakkutilliinerup ingerlanneqarnera paasissutissanillu ingerlatitseqqineq pillugit Kalaallit Nunaanni Namminersorlutik Oqartussat isumaqatigiissuteqarfigisinnaassagai siunnersuutaavoq.

2. Sumiiffinni ataasiakkaani ataatsimoorluni eqqoriaanerit

Sukkaniuffinni sikkilertuninik, qimmit sukkaniuffinni sukkaniunnerinik, tuit timmisillugit sukkaniutsinnerannik aamma hestit sukkaniunnerinik sumiiffinni ataasiakkaani

ataatsimoorluni eqqoriaanerit ingerlanneqartarneri akileraarutitaasalu akilerneqartarneri pillugit maleruagassat, danskit aningaasanoorutit pillugit inatsisaanni nutaami aalajangersakkat assingisut aalajangersarneqarnissaat siunnersuutaavoq.

3. Aningaasat Kalaallit Nunaanni agguanneqartussat

Danskit naalagaaffiata Kalaallit Nunaanni aningaasanoorutit akileraarutitaat 2003-mi taamaatimmagit Kalaallit Nunaannut tunngatillugu isumaqatigiissutigineqarpoq, ukiumi siullermi akilerneqartussaajunnaarsinneqartut amerlaqataat ataatsimoortumik tapiissutinit ukiut tamaasa ilanngaatigineqartassasut. Ilangaasarsimaneq taanna naalagaaffiup tapiissutaanut, Namminersorluni Oqartussaaneq pillugu inatsimmi maanna aalajangersagaasunut tunngaviuvoq. 2003-mi inatsimmik allannguinerup aammattaq kinguneraa Kalaallit Nunaata agguaassisarneq malillugu (tipsernermit agguaassisarneq) aningaasanik pisarunnaarnera. Taarsiullugu Kalaallit Nunaanni aningaasanoorutinit sinneqartoorutit Kalaallit Nunaannut tuttalersinneqarput, aningaasallu tipsernermit lottornermillu iluanaarutinit agguaassisarneq pillugu Inatsisartut inatsisaanni maleruagassat naapertorlugit agguanneqarsinnaalerlutik. Tamatuma kingorna Danske Spil Kalaallit Nunaanni aningaasanoorutinit neqerooruteqarnermik ingerlatsisuulerpoq.

Kalaallit Nunaanni aningaasanoorutinit tunngatillugu Danske Spil-ip allaffissornermut aningaasartuutit ilaat eqquisunullu eqqukkalik tunniussat ilanngaatigisarpai, sinneqartoorutillu sinneri (30 pct.-it missingi) Namminersorlutik Oqartussanut nassiuttarlugit. Tamanna aningaasanoorutinit kisermaassilluni ingerlatsinermi maanna ilaasunut tamanut atuuppoq. Ukiumut naatsorsuusiortusumut 2009-mut tunngatillugu Kalaallit Nunaanni aningaasanoorutinit sinneqartoorutit tamarmiusut 26 mio. kr.-nit missaanniipput. Aningaasat taakku Kalaallit Nunaanni 2010-mi agguanneqassapput.

Aningaasanoorutinit ingerlataqarnerup ilaanik namminersortunngorsaaviginninnerup taassuma kingunerissavaa Danske Spil-ip sinneqartoorutaasa appariaateqarnissaat, tassa ingerlatseqatigiiffiup taassuma taamaallaat eqquiniaasitsinernik aammalu hestit qimmillu sukkaniunnerannik ataatsimoorluni eqqoriaasitsinernik siunissami neqerooruteqarsinnaalernissaata kiisalu ingerlatseqatigiiffiup soorlu selskabit akileraarutaannik akiliisarnissaata kingunerisaannik.

Tamatuma Kalaallit Nunaannut aningaasatigut sunniuteqarnissaa pinngitsoorniarlugu inatsisissatut siunnersuutikkut anguniarneqarpoq aningaasanik Kalaallit Nunaannut agguagassiisarnep siunissami aningaasanoorutinit aalajangersimasunit isertitaasussanit avissaartinneqalernissaa, tassa maleruagassat atuuttut malillugit aningaasat kingullerpaamik tunniunneqartut annertoqqataannik aningaasanut inatsimmi immikkoortitsinikkut. Taassuma kingorna Danske Spil-ip Kalaallit Nunaanni aningaasanoorutitigut isertitaanit sinneqartoorutit ilanngarneqaratik danskit naalagaaffiata karsianut nakkartalissapput.

Tamatuma saniatigut siunnersuutaavoq aningaasat tunniunneqartut atuisunut akigititamut naleqqersuummik aaqqiivigineqassasut. Tamanna Danmarkimi siunissami agguaassasat annerpaaffissaata aaqqiivigineqartarnissaatut ippoq.

Namminersorlutik Oqartussat Kalaallit Nunaanni aningaasanoorutinit neqeroorutitigut maannamut isertittagaasa allannguuteqannginnissaat siunnersuutikkut qulakkeerneqassaaq.

Aaqqissuussineq siunnersuutigineqartoq 2015-ip naannginnerani nalileqqinneqassaaq, tassa aningaasat tunniunneqarsimasut amerlassusiisa nalileqqinneqarsinnaanerit siunertaralugu.

Naalackersuisut isumaliutersuutaat

Teknikkikkut ineriartorneq Kalaallit Nunaata nunarsuaq tamakkerlugu attaveqatigiinnermut ilaalersimanerani kinguneqarpoq, tassami inuiaat assigiinngitsut sullissinermik neqerooruterpassui atuisutut periarfissaalersimmammata. Ineriartorneq taanna nunat tamat aningaasanoorutini ingerlatsinerannut annertuumik sunniuteqarsimavoq. Aningaasanoorneq ukiut kingulliit qulit ingerlaneranni internetsikkut niuernerimi annertuumik tunisaalersimavoq. Internetsip innuttaasut periarfississimavai Danske Spil A/S-ip nioqqutaaniq neqeroorutaanillu aammalu internetsikkut aningaasanoorutiniq neqeroorutillit Storbritanniami, Maltami, Gibraltarimi nunanilu allarpassuarni angerlarsimaffeqartut nioqqutaannik sanilliuassinissamut.

Danske Spil aningaasanoorutiniq Kalaallit Nunaanni kisermaassilluni neqerooruteqartuunerminik maannakkutuut ingerlatsiinnaraluarpalluunniit naatsorsuutigineqarsinnaanngilaq kaaviiartitat ilaasa annertusiartuinnartut, aningaasanoorutiniq neqerooruteqartunut allanut aammalu Danske Spil-imut killilersuutaasunit nammakkersugaanngitsunut atorneqartarnissaasa pinngitsoortinneqarsinnaanera.

Tamanna tunngavigalugu Naalackersuisut naliliipput aningaasanoorutinit tunngasut ilaasa namminersortunngorsaavigineqarnissaasa Kalaallit Nunaannissaq atuutsinneqalernissaa pitsaasuussasoq. Aningaasanoorutit ilaannik namminersortunngorsaaviginninnerup ilaatigut Danske Spil unammillernerimi pitsaanagerusumik inissisimalersissavaa, ilaatigullu Kalaallit Nunaanni aningaasanoorutit amerlanersaasa inatsisit periarfissarititaasa iluanni ingerlanneqarnissaat qularnaannerulersissallugu. Aningaasanoorutiniq neqeroorutaasunik atuisunut toqqissisimanartuussaaq ilisimallugu aningaasanoorutiniq neqerooruteqartut ataasiakkaat aalajangersakkanik inatsimmi aalajangersagaasunik malinnittussaanerat, matumani ilanngullugu aningaasanoorutiniq neqerooruteqartut aningaasanoorutinit oqartussaasunit misissuiffigineqarsinnaanerat.

Aningaasanoorutitigut Kalaallit Nunaanni kaaviiartitat ukiut ingerlaneranni qaffakkiartorsimapput. Tassa 2004-mi 64,2 mio. kr.-iniit 2009-mi 88,4 mio. kr.-inut qaffassimallutik, tamannalu 38 procentingajannik naleqarluni. Aningaasanoorutini Danske Spil-ip siunissami kisermaassisuuffigiinnagassaani (tassa imaappoq lottomi, kiliortakkani, Kenomi, internetsikkut bingortitsinerimi il.il.) piffissami tassani qaffariaat 16 pct.-ingajaasimavoq. Taamaalilluni takuneqarsinnaavoq kaaviiartitat ilaat annertusiartuinnartut aningaasanoorutinit Danske Spil-ip siunissami kisermaassisuuffigiunnaagassaani atorneqartartut.

Aningaasanoorutit ilaasa namminersortunngorsaavigineqarnerisigut Danske Spil-ip aningaasanoorutiniq neqeroorutimigut, namminersortunngorsaaviginninnermit eqqorneqartutigut kaaviiartitaasa appariaateqarnissaat naatsorsuutigineqartariaqarpoq, aningaasanoorutimmi taakku kaaviiartitsissutaanerat annertusiartuinnartoq aningaasanoorutiniq neqerooruteqartunut allanut tuttalersussaammat.

Danske Spil-ip sinneqartoorutaasa ilaannik tunniussisarnermik aaqqissuussinerup maannakkut atuuttup, danskit naalagaaffiata Namminersorlutik Oqartussanut aningaasanik aalajangersimasunik ukiumoortumik tunniussisalernissaanik aaqqissuussinermik taarserneqarnissaanik siunnersuummut tunngaviupput aningaasanoorutit ilaasa namminersortunngorsaavigineqarnerisa kingunerisaanik Danske Spil-ip tunngaviumik atugassarisaanut allannguutit. Allannguutit ilaatigut kingunerissavaat aningaasanoorutit

namminersortunngorsaavigineqartut iluanni neqerooruteqarsinnaanerup selskabimut Danske Spil-imit pilersinneqartumut isumagisassanngortinneqarnissaa. Selskabi taamaattoq selskabit allat assigalugit danskit naalagaaffiannut selskabit akileraarutaannik akiliisartussaavoq. Aammattaaq Folketingip aalajangerpaa aningaasanoorutit namminersortunngorsaavigineqartut akileraarutaat 30-miit 20 procentimut appartinneqassasoq.

Tamanna tunngavigalugu Naalakkersuisut isumaqarput aningaasat Kalaallit Nunaannut tunniunneqartartut maannakkut annertussusiannik (atuisunut akigititamut naleqqersuummik aaqqitanik) aalajangiusimanninnissamik siunnersuut aaqqiinerusoq Kalaallit Nunaannut naleqquttoq.

Kalaallit Nunaanni inatsisinut tunngatillugu

Aningaasanoorutit ilaat pillugit Kalaallit Nunaannut inatsisissatut siunnersuummik aalajangiussineq Kalaallit Nunaanni inatsisinik allannguisariaqarnermik kinguneqassanngilaq.

Aningaasatigut allaffissornikkullu kingunerisassai

Aningaasanoorutit ilaat pillugit Kalaallit Nunaannut inatsisissatut siunnersuummik aalajangiussineq Kalaallit Nunaanni Namminersorlutik Oqartussanut aningaasatigut allaffissornikkullu kinguneqartussaannngilaq.

Tusarniaaneq:

Aalajangiiffigisassatut siunnersuut manna oqaatsit marluusut atorlugit piffissami xx. juli-miit 27. august 2010 tikillugu tusarniassutigineqareerpoq. Aningaasanoorutit ilaat pillugit Kalaallit Nunaannut inatsisissatut siunnersuutip kalaallisut nutserneqarnera piffissami tusarniaaffiusumi Naalagaaffimmi oqartussaasut tungaannit piareerseqarsimanngimmat, inatsisissatut siunnersuutip qallunaatuaa kisiat aalajangiiffigisassatut siunnersuummut ilanngunneqartariaqarsimavoq.

Taama kingusitsigisumik tusarniaaneq inatsisissatut siunnersuutip inaarneqarnissaata annertungaatsiartumik suliaasimaneranik pissuteqarpoq. Aningaasanoorutit pillugit maleruagassat maanna atuuttut ulloq 1. januar 2011 aallarnerfigalugu atorunnaartussanngorunnarmata, aalajangiiffigisassatut siunnersuutip Inatsisartunut saqqummiunneqarnissaa taamatullu aamma piffissaq tusarniaassutigineqarfissaa kinguartinneqarsinnaasimanngillat.

Tusarniaanermi akissutit tiguneqartut allannguinissamut tunngavissiinnngillat.

Inassuteqaat:

Naalakkersuisut inassutigaat aningaasanoorutit ilaat pillugit Kalaallit Nunaannut inatsisissatut siunnersuutip taamatut isikkoqarluni aammalu kingusinneruklut inatsisitigut allannguutaasinnaasut ilanngullugit Kalaallit Nunaanni Namminersorlutik Oqartussanit akuersaarneqarsinnaanerata, Naalakkersuisunit naalagaaffimmi oqartussaasunut nalunaarutigineqarnissaa Inatsisartut isumaqataaffigissagaat.